

Mir bruched es Wunder

Eine Komödie in 2 Akten von Edi Baumann

Personen: 14 Personen

5 - 8 Herren und 6 - 9 Damen

Josef von Felsenstein

Patron Weingut Felsenstein

Dagmar von Felsenstein

Frau von Josef

Patrick Josef von Felsenstein

Sohn und Geschäftsführer

Anna von Felsenstein - Müllerhans

Frau von Patrick Josef

Sven Patrick Josef von Felsenstein

Enkel von Josef, Sohn von Patrick

Lars auch w möglich

Enkel*in von Josef, Sohn/ Tochter von Patrick

Melissa Spross

Freundin von Sven Josef

Marco Silva

Gärtner

Elvira Russo

uneheliche Tochter von Josef

Horst Einbaum auch w möglich

Buchhalter*in

Marcel Hulliger

Bänker

Fränzi Füglistaler

Freundin von Patrick Josef

Priska Happel auch m möglich

Journalist*in

Wanda

junge Haushälterin

Vorwort mit Inhaltsangabe

Josef von Felsenstein braucht ein Wunder! Das traditionelle Familien-Weingut in der 8. Generation steht vor der Insolvenz. Sein Sohn Patrick Josef scheint überfordert und sieht sich doch als Retter. Der Enkel Sven Patrick Josef wird mit seiner Liebe zum Bio-Anbau total übergangen und sein Bruder Lars lebt lieber in der Nacht. Dazu sorgen alle Frauen, jede auf ihre ganz spezielle Art, für viel Turbulenzen und Verwirrung. Ist Elvira wirklich eine uneheliche Tochter von Josef? Geheimnisvoll sind auch die Rollen des Gärtners und der Haushälterin. Und man fragt sich, was der Bänker Hulliger auf dem Kerbholz hat und was die Journalistin Happel im Schilde führt? Bei all den Problemen ist der Buchhalter Horst Einbaum wirklich nicht zu beneiden. Bleibt vor allem eines offen, kann er die Insolvenz noch abwenden?

Bühnenbild (Aus Publikum-Sicht)

Beide Akte spielen in der Bibliothek. Darin hat es ein Sofa und einen Sessel vorne links. Im Hintergrund hat es rechts ein Pult mit Stuhl. Rundum Bücherregale mit Büchern. Rechts eine Türe, die vom Gang herkommt, hinten in der linken Hälfte eine Türe zum Wohnzimmer und links die Verandatüre.

Akt 1

Szene 1

Josef im Sessel, Horst im Sofa
Wanda, Sven, Melissa, Marco, Lars

Josef (verzweifelt laut, springt vom Sessel hoch) Mir bruched es Wunder!
Wanda (kommt von rechts rein) Sie händ grüeft Herr von Felsenstein?
Josef Es Wunder, nöd Wanda!
Wanda Tschuldigung, ich han min Name verstande! Chan ich öppis bringe?
Josef Es Wunder, Wanda, bringed sie es Wunder!
Wanda Isches scho so schlimm?
Josef Wanda, bitte, das sind Internas!
Wanda Uii! Isch das en Virus?
Josef Nei Wanda, ehrlich gseit, isch es eifach nöd für sie bestimmt!
Wanda Bin scho weg! (geht)
Horst Sepp ihr bruched sofort en Turnover! Suscht sind ihr Endi Jahr insolvent! Die Marketing-Strategie vo dim Sohn triebt eu in Ruin!
Wanda (kommt rein) Es chlises Wunder isches würklich, aber en neue Gärtner wär da!
Horst (springt auf) Wie, was, wo! Neue Gärtner! Sepp das isch nöd din Ernscht!
Josef Mir bruched en Gärtner! Ehrlich gseit e Villa vomene Wyguet, wo nöd pflägt isch! Unmöglich, mir sind es renommierts Wyguet am Zürisee, das Wyguet schlächthin in Züri!
Horst Schlächt ja das passt und hin isches au bald, wenna so witer ghat! Mit «es war einmal» fanged nöd nur Märli a Sepp, sondern au de Ruin vo renommierte Firmene! Wie willsch du en neue Gärtner zahle? Ihr sind so guet wie pleite!
Josef Du bisch euse Buechhalter sit 25 Jahr, du wirsch das scho schaukle. Zudem ghits en sensationelle Jahrgang!
Horst Uf allne andere Wygüter bestimmt, aber ihr mached drus kein guete Wy meh! D'Lüt wänd eue Wy nüme, begrifsch?
Wanda Stimmt, das han ich au scho ghört!
Josef Wanda bitte, wie oft muess ich ihne no säge, dass sie nöd sölled zulose! Sie sind würklich fürchterlich neugierig!
Wanda (schmunzelt verschmitzt und steht ganz stramm) Warte nur uf ihri Befehl! Was isch jetzt mit em Gärtner? Er wartet und isch sehr sympathisch - und gseht au no guet us!
Sven (kommt mit Freundin Melissa rein) Opi, isch de da use öpe de neu Gärtner?
Melissa Isch de au Bio?
Josef Ich han da es üsserscht heikels Gspröch über eusi Finanzsituation und alles was ihr chönnd fröge, öb de Bio isch! Und Sven und Melissa händ ihr vergässe, was ihr mit eusem langjährige, treue Gärtner Willi gmacht händ? Es isch es Wunder, dass ihr eu überhaupt da ine troued!
Wanda Na also nachem Gärtner scho es 2. Wunder, es gaht richtig guet vorwärts!
Sven Opi easy! De Willi isch sooo en Giftbrüeder gsi, ehrlich!
Melissa Und mit Kritik hät er au nöd chönne umgha.
Josef Ehrlich gseit ghits trotzdem kein Grund ihn mit Pestizid z'bespraye.
Sven De het das verdient! So het er emal am eigene Körper gspürt, was sini Pflanze müend erdulde! Opi hesch scho mal öppis vo Oeko und Bio ghört?

Melissa Mir Junge wännnd au no öppis vo dere Erde!

Josef Trotzdem isch es nöd luschtig gsi, das het is Aug chönne gha!

Sven Es isch aber nur uf d’Kleider und id Nase, weisch du überhaupt wie gföhrlich Pestizid sind?

Melissa D’Liste vo mögliche Gfährdigunge isch mega lang: akuti und chronischi Huterkrankige, Vergiftige, Krebs, Fruchtbarkeits- und Erbguetschäde, sogar Missbildige bi Neugeborene! Pestizid sind e richtigi chemischi Waffe!

Sven Und das bi eus im Garte! Mir träged au e Verantwortig für eusi Mitmensche!

Josef Trotzdem, dass ihr ihn gfesslet händ und ihn mit sim Dünger e Kurpackig im Gsicht gmacht händ, isch nöd luschtig gsi!

Melissa Die Kur wird er nöd so schnäll vergässe (S und M lachen) Das isch au kein Bio-Dünger gsi, sondern reins Gift! Suscht het er niemals sonen Usschlag übercho und es het au nöd so extrem bisse.

Josef Und wieso händ ihr ihm dauernd alles versteckt und ihn sabotiert?

Sven Opi! Benzinmäher, Ameisegift, Unchrutvertilger, Schnäggehörner, sorry, s’ezing natürliche isch bi dem doch sin Achselschweiss! (S und M lachen)

Melissa Mir sind gspannt uf de neu Gärtner!

Josef Sowit chunnts no, de bestimm ich ganz allei. De Willi isch immer no ide Psychi!

Horst Und ich chan wieder luege, wie mir das zahle wänd! D’Krankekasse macht Problem!

Sven Mir blibed! Opi mir sind strikt für Bio und es ghat um d’Welt vo eus Junge und eusne Nachkomme! Wanda bring en ine!

Josef Denn halt ihr biologische Sturchöpf, ihr sind no sturer als ich! Wanda ich lahn bitte!

Lars (kommt rechts mit Bier rein getorkelt) O läck, was isch denn das für en Uflauf! Händ ihr senili Bettflucht!

Josef Woher chunsch du jetzt Lars?

Lars Vo dusse bini inne cho! (lacht doof)

Wanda Sorry, das isch nöd de Gärtner, das isch s’schwarze Schaf!

Lars Nöd rassistisch Wanda Chlises! Schaf langed! (gröhlt)

Wanda Nöd sexistisch Lars, Wanda langed! (macht gröhlen nach)

Sven Ehrlich Brüeder häsch wieder die ganz Nacht dure gmacht!

Lars Eine muess ja idere Familie d’Nachtschicht überneh! Guet Nacht ihr Streber und nöd z’lut ich bruch min Schönheitsschlaf! (hinten weg)

Josef (aufgebracht) Ehrlich gseit, rettet de das Wyguet au nöd! Wo blibt jetzt de Gärtner Wanda!

Wanda Isch de Lars weg? Suscht isch de Gärtner au grad wieder weg! (zu Marco) Chasch cho!

Marco (kommt hereingeschossen) Salutti a tutti! Kein Garte muess warte, denn dank em Marco wird drus en Parco! (lacht) Gestatte Marco Silva, Silva wie de Wald.

Josef Danke Wanda!

Wanda Bitte (und bleibt)

Melissa Herr Silva verstönd si öppis vo Bio?

Wanda Logisch es isch eifach türer! (lacht)

Josef Danke Wanda!

Wanda Bitte (und bleibt)

Marco Niente Silva, seg eifach Marco!

Melissa Cool denn Marco, ich bin d'Melissa und was haltisch vo Bio?

Josef Melissa bitte, d'Frage stell immerno ich! Herr Silva, gstattet Sie, ich bin de Patron idem Hus, Josef von Felsenstein, das isch euse Buchhalter der Herr Einbaum, min Enkel Sven und sini Fründin, wo sie ja scho kenne glernt händ, d'Melissa!

Marco Sympatico Guiseppe! Ihr chönnd mir eifach Marco säge!

Sven Und was meinsch jetzt zu Bio, Marco?

Marco Si, si Bio, ich bin quasi de Erfinder vo Bio! Bio isch eigentlich scho fascht min 2. Vorname. Marco Bio Silva! Das tönt doch guet!

M & S Geil!

Josef Es langed! Ich bin da de Patron!

Marco Bene Padrone! Ghits no Frage?

Josef Wänn chönnd si afange, de Garte hats bitternötig!

Marco Subito, wänn de Lohn stimmt!

Horst Also was isch mit Zügnis und Referenze und überhaupt das mit em Lohn isch...

Josef Isch ja guet Horst! Mir bruched sofort öppert! (zu Marco) Es ghit gnueg Lohn!

Wanda Ehrlich gseit eifach nöd pünktlich!

Josef Wanda händ si nüt z'tue?

Wanda Sie säged doch immer ehrlich gseit (doof betont), aber isch ja guet, bin scho weg! (Abgang)

Sven Ich würd den grad gern mit dir de Bio-Plan und alli Umstrukturierige aluege!

Marco Perfetto!

Horst Nöd so schnäll, mir müend zerscht de Vertrag ufsetze!

Marco Contrarre isch immer guet, wegem verspötete Lohn!

Josef Denn lönd eus das erledige, damit de Garte bald wieder es Bijou isch!

M, J, H (Abgang)

Melissa Okay Sven, denn hol doch eusi Bücher, mir mached ide Zwüschezyt ade Bibkiothek witer.

Sven Alles klar, ich hole grad no es paar Buecher vo eus. Ich hoffe de chan bald afange (geht ab!).

Melissa (zieht Bücher raus)
 Frau & Herd - ein Ratgeber (wirft es verachtend in eine Kiste)
 Der Schritt vom Fräulein zur verheirateten Frau (wirft es verachtend in eine Kiste)
 Erfolg am Stammtisch – ein Ratgeber (wirft es verachtend in eine Kiste)
 Putzfibel für die perfekte Ehefrau (wirft es verachtend in eine Kiste)
 En Bildband vom KKW Kaiseraugst ein Blick in die Kernkraft (wirft es verachtend in eine Kiste)
 Und no en Bildband: Moulin Rouge ein Männertraum (wirft es verachtend in eine Kiste)

Sven (platzt rein ohne Bücher)

Melissa Wo häsch eusi Buecher?

Sven De Marco fangt hüt scho a, chumm er wartet uf eus im Garte!

Melissa So cool!
 Beide gehen durch die Veranda-Türe ab!

Szene 2

Josef, Horst und Patrick treten von hinten ein
Wanda, Dagmar, Anna, Lars

Josef (beim Eintreten) Mir bruched es Wunder!
Wanda (kommt von rechts) Sie händ grüeft Herr von Felsenstein?
Josef (entnervt) Es Wunder, Wanda, es Wunder
Wanda Dänket sie a ihres Herz Herr von Felsenstein! Söll ich ihne es Tablettli hole?
Josef Ich bruche keis Tablettli, ich bruche es Wunder!
Patrick Papi, ich han doch scho alles umstrukturiert, das brucht jetz nur nochli Zyt! Bis s'neue Marketing grifft!
Horst Erlaub mir d'Bemerkig. De Wechsel uf Halbeli chan nöd funktioniere. Wer trinkt denn hüt no Halbeli!
Josef Und de neu Chinderwy Pingus wänd no weniger! Patrick bisch du dir überhaupt bewusst, was du mit dere neue Marketing-Strategie agrichtet häsch? Mir bruched eifach es Wunder!
Wanda Das laht sich so eifach säge, aber glaub si mir Wunder sind öppis...
Josef ... Wanda was mached si no da, das gaht si alles nüt a!
Wanda Und was isch, wenn si doch plötzlich es Tablettli bruched? Und ich lose ja au gar nöd zue. Ihri Problem mit Halbeli und Chinderwy sind mir glich, aber ihres Herz Herr von Felsenstein!
Josef Ehrlich geseit! Halbeli und Chinderwy, das isch doch e richtigi Patrick Josef Schnapsidee!
Wanda Genau Schnaps das wär doch die Idee!
Josef Wanda!
Wanda Wott ja nur helfe, ghat schliesslich au um min Lohn!
Josef Ich weiss nöd, öb si e grossi Hilf sind, sie mached ihre Job und de Patrick sine!
Wanda Nur mach ich mine guet!
Josef (seufzt) Da händ si ja recht, Wanda!
Patrick Paaappppi! Marketing brucht Zyt!
Horst Und genau die hämmer nöd, ich sege nur Insolvenz! Mir bruched e hochgrädigi Lösig, aber sofort!
Wanda Säg ja Schnaps, de het 40%!
Patrick Lönnd mich mache, ich han alles im Griff!
Josef Das hämmer ja gmacht! Mir händ dich mache lah, gsesch wohi das gfüehrt het!
Patrick D'Welt wird eus no die hochklassige Halbeli us de Händ risse und es wird keis Chinderfäscht meh ohni euse Pingus geh!
Wanda Ich gseh scho de Titel vom neuschte Chinderbuech: Globi im Rebberg!
Josef Wanda es langed, obwohl de guet gsi isch! (schmunzelt)
Josef Patrick mir händ die Zyt nüme! Drum müend mir jetzt, hüt no ...
Lars (kommt von hinten als Pinguin rein) Was macht denn das Kostüm uf mim Bett?
Wanda Oha neue Titel: Pingu im Rebberg!
Patrick Fertig mit dim Lotterlebe! Ab hüt übernimmsch Verantwortig! Du wirsch euse Pingus ide Ichaufzenter pusche! Verantwortig Lars!
Wanda So cool en betrunckne Pinguin chunnt sicher guet a!
Lars Genau! Das chasch nöd bringe und nüchtern macht das niemmert!

Patrick Marketing Lüt, Marketing!
Anna (platzt voll bepackt mit Einkaufstüten rein) Lueg Schatz, ich han so schöni Sache poschtet!
Patrick Ich chumme grad cho luege Schnuggi, nur no es Momentli!
Anna Nie hesch gschwind Zyt für mich, debi han ich doch die neu Kollektion vom Guzi kauft!
Patrick Gucci, Anna Schnuggi, Gucci heisst de!
Anna Guzi, säg ich doch!
Wanda Also es tönt scho echli anders, find ich!
Josef Anna bitte, chönntisch du dusse warte? Mir sind mitte inere wichtige Besprächig! Da gahts um meh als Gucci!
Anna Also so öppis, ich dörf doch no mim Ma zeige, was ich kauft han. Schliesslich isch er de Chef und seit eu denn scho, wenn ihr was mached müend!
Josef Anna, was fällt dir i!
Anna Patrick bisch de Chef oder nöd!
Patrick Natürlich!
Anna Denn setz dich dure, Schatz! Das muesch du chönne! Suscht lönnd die alte Lüt nie los!
Josef Anna, es langed wüerklich, wem verdanksch du dis Luxusläbe?
Anna Ich het also sicher au en andere Riche gfunde, wenn das meinsch!
Patrick Papi, bis doch nett mit de Anna, ich chumme nachher grad wieder zu eu, denn bespreched mir alles in Ruh, nehmet doch so lang no es Halbeli! Schnuggi ich chumme! (Geht ab)
Anna (dreht sich nochmals um beim Abgang) Gsender gaht doch! Oje Lars, Schatz, bitte zieh das blöde Kostüm us, chauf öppis rächts für d'Fasnacht! Und Wanda bringed sie no en Schämpis uf euses Zimmer?
Wanda (Beim hinterher gehen) En Pingus oder en Ächte?
Patrick Wanda, eines Tages ...
Wanda ... passiert's! Jetzt han ich aber richtig Schiss! (lacht)
Josef Lars häsch nöd ghört, ab umzieh!
Lars (geht hinten ab)
Josef Horst euses Problem isch richtig gross!
Horst Eher beschränkt als gross! Tschuldigung Sepp, aber die zwei chönd die Firma unmöglich führe! D'Lag isch wüerklich ernscht! Wenn begriffd de Patrick das ändlich?
Josef Ich wird no wahnsinnig mit dem Bueb und sinere Gumsle!
Dagmar (kommt rein) Händ ihr no lang? Mit dene Gsichter chönd ihr chum no gueti Gschäft mache!
Josef Es isch ernscht Dagmar Schatz!
Dagmar Uuuiii das muess aber fürchterlich ernscht si, wenn du mir sogar Schatz seisch! S'letschtmal häsch mir das glaub vor öppe 5 Jahr gseit bi eusem letschte ...! (lacht)
Josef ... Isch guet, das interessiert grad niemert und mir isch ächt nöd ums Lache!
Dagmar was wotsch?
Dagmar Ach Sepp min Schatz (schmunzelt) Du weisch doch, nach em Golf han ich immer gern es Aperöli! Chömmeder au?
Josef (genervt) Dänn nimm din Apéro! Ich han weiss Gott anderi Sorge!

Dagmar Dis Herz, Sepp! Pass echli uf! Nöd das no en Pflägfall wirsch, das würd mir grad no fähle! Uf jede Fall tät dir jetzt en Apéro besser, als dich mit irgendwelche Luxusproblemlü ume z'schlah!

Josef Insolvenz isch keis Luxusproblemlü! Dagmar mir bruched es Wunder!

Wanda (kommt von links) Sie händ grüeft Herr von Felsenstein?

Josef Nei kei Tablette, es Wunder Wanda, aber das interessiert mini Frau ja nöd!

Dagmar Ich bruch jetzt würklich en Apéro, immer die Panikmache!

Wanda Wännnd si es Halbeli?

Josef (völlig fertig, dreht durch) Es Halbeli, Chinderwy, Gucci, Pingus, Golf, Apéro, Insolvenz, Ruin! Mir bruched es Wunder (weint)

Horst Am beschte mir bringed ihn is Bett, er isch komplett fertig und überforderet! Er brucht sofort Ruh, schuscht macht sis Herz das nümme lang.

Josef (stammeld leise weiter)

Dagmar Sepp würklich! Bi de chlinschte Belaschtig bisch immer grad überforderet! Wenigschtens sinds nur d'Nerve und nöd wieder s'Herz! Wanda bringed si en is Bett und bringed si mir nachher de Apéro uf Terrasse. Immer de Stress!

Wanda Verstande, Sepp is Bett, Wy für si! Und de Stress de händ sie scho!

Horst Denn gang ich au, idem Hus schient alles wichtiger als e finanzieli Lösüg!

Alle ab!